

四庫全書

史部

欽定四庫全書

史部

欽定續文獻通考卷一百五十三

四

給事中_臣劉芬覆勘

總校官內閣中書_臣孫溶

欽定四庫全書

欽定續文獻通考卷一百五十三

經籍考

經春秋

宋史藝文志春秋類二百四十部二千七百九十九卷

不著錄者二十三
部四百八十八卷

遼金元三史不立藝文志散見各紀傳中

明史藝文志春秋類一百三十一部一千五百二十五

卷

宋

左傳節文十五卷

舊題歐陽修編

臣等謹案是編刻于明季取左傳之文略為刪削
每篇之首分標叙事議論詞令諸目又標神品能
品真品具品妙品諸名及章法句法字法諸字前
有修自序序中稱胡安國春秋傳及真德秀文章

正宗其為作偽無疑也

洪咨夔春秋說三十卷

咨夔字舜俞於潛人歷官端明殿學士

趙鵬飛春秋經筌十六卷

鵬飛字企明號木訥綿州人

鵬飛自序略曰春秋每多異說麟筆一絕三家鼎峙及何休杜預之注興則又各護所師交相矛盾於聖經何有哉又曰三傳固無足據然公吾心以

觀焉惟范甯為近公論三家均舉其失所師之失亦從而箴之故穀梁子之傳實賴甯為多而王通亦曰范甯有志乎春秋焉

留夢炎序略曰麟經之傳於蜀自濂溪先生仕於合伊川先生謫於涪金堂謝持正先生親受教於伊川以發明筆削之旨老師宿儒持所討論傳述其徒雖前有斷爛朝報之毀後有偽學之禁而守

之不變故薰陶浸漬所被者廣如馮公輔朱萬里
張習之劉光遠先生皆一時所宗木訥趙先生獨
抱遺經窮探冥索實為之倡所著詩故經筌二書
有功於聖經甚大詩故湮沒不傳惟經筌獨存其
為說不外乎濬洛之學而善於原情不為傳注所
拘至於推見至隱使二百四十二年事瞭如在目
焉

納喇性德曰春秋之傳五鄒氏無師夾氏未有書

列於學官者三焉漢志二十三家隋志九十七部
唐志六十六家未有舍三傳而別自為傳者自啖
助趙匡稍有去取折衷至宋諸儒各自為傳或不
取傳注專以經解經或以傳為案以經為斷或以
傳有乖謬則棄而信經往往用意太過不能得是
非之公嗚呼聖人之志不明於後世久矣蓋嘗讀
黃氏日抄見所采木訥趙氏之說恒有契於心焉
既得經筵定本乃鐫板而傳之善哉木訥子之言

乎善學春秋者當先平吾心以經明經而無惑於
異端則褒貶自見蓋春秋公天下之書學者當以
公天下之心求之斯言也庶幾得是非之公而聖
人之志以弗晦焉已

李石左氏君子例一卷 詩如例一卷 詩補遺一卷
石見易類

臣等謹案左氏傳多有君子曰字林栗指為劉歆
所加其說無據石以為左氏傳有所謂君子曰者

皆示後學以褒貶大法因錄為例又以引詩與今
說詩者不同因取所載一篇一句悉裒集而闡論
之名曰詩如例復採所載箴詞歌謠名曰詩補遺
石門人劉伯熊合為一編題曰左氏諸例實非石
之舊名今仍各標本目云

戴溪春秋講義四卷

溪字少望永嘉人淳熙五年為別頭省試第一歷官
工部尚書華文閣學士卒贈端明殿學士謚文端事

蹟具宋史儒林傳

魏了翁左傳要義三十一卷

了翁見易類

張洽春秋集注十一卷綱領一卷

洽字元德清江人朱子弟子嘉定進士累官至著作
佐郎謚文憲事迹具宋史道學傳

納喇性德曰洽於春秋有集傳集注地理沿革表
三書端平中進於朝宣付祕閣明洪武初頒五經

四書於學官傳註多宗朱子惟易則兼用程朱傳義春秋則胡氏傳張氏註並存久之習易者舍程傳而專宗朱子習春秋者胡傳單行而集註流傳日鮮今誦其書集諸家之長而折衷歸於至當無胡氏牽合之弊允宜頒之學官者也

李明復春秋集義五十卷 綱領三卷

明復一名俞字伯勇合陽人嘉定間太學生

張宣曰宋嘉定間太學生李俞編進俞舊名明復

字伯勇取周程張三子或著書以明春秋或講他經以及春秋或其說有合於春秋者皆廣收之定其後先審其精粗各附於本章之次有魏鶴山序朱彞尊曰宋史藝文志載李明復春秋集義五十卷又載王夢應春秋集義五十卷予嘗見宋季舊刻即李氏原本而王氏刊行之非王氏別有集義也宋史兩存之誤矣

陳深清全齋讀春秋編十二卷

深字子微平江人嘗題所居曰清全齋因自號清全
納喇性德曰子微自宋社既屋即謝去舉業沉潛
學問淹貫遺經閉門教授鄭元祐稱其年登髫耆
生識先輩著書立言咸造底蘊良有然矣讀春秋
編原本左胡採摭衆說深有益於學者

呂大圭春秋或問二十卷附春秋五論一卷

大圭字圭叔號樸鄉南安人淳祐進士官至朝散大
夫知興化軍元兵至沿海都制置蒲壽庚舉城降令

署降箋不從遇害

大圭論曰春秋所書其義有春秋之通例有聖人之特筆有日則書日有月則書月名稱從其名稱爵號從其爵號與夫盟則書盟會則書會卒則書卒葬則書葬戰則書戰伐則書伐弑則書弑殺則書殺一因其事實而無所加損焉此通例也其或史之所無而筆之以示義史之所有而削之以示戒者此特筆也用通例而無所加損者聖人之公

心有特筆以明其是非者聖人之精義

何夢申跋云傳春秋者幾百家大抵以褒貶賞罰為主蓋三傳倡之諸儒和之惟朱文公以為不然今載於門人所記錄者略見一二獨恨未及成書耳廣文呂先生嘉惠潮士諸士有以春秋請問者先生出五論示之咸駭未聞因并求全稿先生又出集傳或問二書蓋本文公之說而發明之有五論以開其端有集說以詳其義又有或問以極其

辨難之指歸而春秋之旨明矣夫子之心至文公而明文公之論至先生而備先生亦有功於世教矣

納喇性德曰春秋論五篇共一卷一曰論夫子作春秋二曰辨日月褒貶之例三曰特筆四曰論三傳所長所短五曰世變五論閎肆而嚴正春秋大旨具是矣圭叔少嗜學師事鄉先生王昭昭為北溪陳淳弟子淳受業晦菴淵源之來人稱溫陵宗

派宋社既屋人爭北向圭叔大節凜凜道學亦何
負於人國乎

家鉉翁春秋詳說三十卷

鉉翁號則堂眉州人以蔭補官賜進士累官端明殿
學士簽書樞密院事

龔璘曰至元丙子宋亡以則堂先生歸置諸瀛州
者十年乃成此書自瀛寄宣託於其友肅齋潘公
從大藏之蓋久而綱目十篇學士大夫已盛傳於

世矣泰定乙丑宣學以廩士之羸刊大學疏義等書取諸潘氏鋟梓於學凡三十卷其曰春秋詳說者蓋俟夫說約者得經旨焉此先生著述之意也朱申春秋左傳句解三十五卷

申見禮類

王鏊序略曰春秋左傳詳節三十五卷宋魯齋朱申周翰注釋今董南畿學政黃侍御希武翻刻以示後學者也侍御以近世學者莫不為文而未知

文之有法故刻示之予序之曰文非道之所貴也而聖賢有所不廢左氏疏春秋於聖人之旨殊未得也而載二百四十二年列國諸侯征伐會盟朝聘宴饗名卿大夫往來詞命則具焉其文蓋爛然矣於時若臧僖伯哀伯晏子子產叔向叔孫豹之流尤所謂能言而可法者下是雖疆場之人亦善言焉有若展喜瑕呂飴甥賓媚人解揚是已方伎之賤亦善言焉有若史蘇梓慎裨竈蔡墨醫和醫

緩祝鮑師曠是已屬國之遠亦善言焉有若邾子
駒支季札聲子沈無戌遂啟疆是已閨門之懿亦
善言焉有若鄧曼穆姜定姜僖負羈之妻叔向之
母是已於戲其猶有先王之風乎其辭婉而暢直
而不肆深而不晦鍊而不煩繩削後之以文名家
者孰能遺之而為史者尤多取法焉蓋已幾於醇
且粹矣學者因是而求之為文之法盡在是矣若
夫究聖人筆削之旨以寓一王之法自當求其全

以進於經

王穉登曰周翰輯是書無裨左氏裨夫學左氏者耳

李琪春秋王霸列國世紀編三卷

琪字開伯號竹湖吳郡人累官國子司業書成於嘉定辛未

琪自序略曰是書敘東周十有四王之統合齊晉十有三霸之目舉諸侯數十大國之系皆世為之

紀不失全經之文略備各代之實每紀之後叙其事變之由考得失之故參諸傳之紀以明經之所書初學問津或有取焉

周自得序略曰初得竹湖李氏所著世紀疑為析裂經文既觀其分王伯之行事世系之本末復叙其治亂興衰之故而論之讀者一目而洞徹原委則極嘆前輩之讀書不苟而由是會經傳之大全以探筆削之深意未必非通經之一助也

春秋通論二卷

題宋人撰不著名氏

金

利鑾孫春秋握奇圖一卷

鑾孫字士貴盱江人

元

吳澄春秋纂言十二卷 總例一卷

總例藝文畧作二卷

澄見易類

澄纂言自序略曰三傳得失載事則左氏詳於公
穀釋經則公穀精於左氏意者左氏必有案據之
書而公穀多是傳聞之說況人名地名之殊或由
語音字畫之舛此類一從左氏可也然有考之於
義確然見左氏為失而公穀為得者則又豈容以
偏徇哉漢儒專門守殘護缺不合不公誰復能貫
穿異同而有所去取至唐啖助趙匡陸淳三子始
能信經駁傳以聖人書法纂而為例得其義者十

七八自漢以來未聞或之先也觀趙氏所定三傳異同用意密矣惜其子奪未能悉當間嘗再為審定以成其美其間不繫乎大義者趙氏於三家從其多今則如朱子意專以左氏為主倘義有不然則從其是左氏雖有事迹亦不從也一斷諸義而已欲因啖趙陸氏遺說博之以諸家參之以管見使人知聖筆有一定之法而是經無不通之例不敢隨文生義以侮聖言故先為正其史之文如此

總例自序略曰屬辭比事春秋教也昔唐啖助趙
匡集春秋傳門人陸淳又類聚事辭成纂例十卷
今澄既采摭諸家之言各麗於經乃分所異合所
同倣纂例為總例七篇初一天道次二人紀次三
嘉禮次四賓禮次五軍禮次六凶禮次七吉禮例
之綱七例之目八十有八凡春秋之例禮失者書
出於禮則入於法故曰刑書也事實辭文善惡必
見聖人何容心哉蓋渾渾如天道焉嗚呼其義微

矣而執謙自謂之竊取區區末學詎可得與聞乎
程端學春秋本義二十卷 春秋或問十卷 三傳辨
疑二十卷

端學字時叔慶元人至治進士官國子助教遷翰林
國史院編修官事蹟附載元史儒學傳韓性傳中

臣等謹案端學慨春秋一經未有歸宿之旨因徧
索前代說春秋者凡百三十家折衷異同湛思二
十餘年作本義以發聖人之經旨作辨疑以計三

傳之疑似作或問以校諸儒之異同至正三年浙東廉訪使慶喜上其書於朝詔慶元路儒學版行天下

黃復祖春秋經疑問對二卷

復祖字仲麓廬陵人

臣等謹案元史仁宗皇慶三年復科舉法漢人南人第一場明經經疑二問四書內出題經義一道各治一經元統以後少變程式易第一場四書為

本經復祖序稱至正辛巳大科即元史志所謂變
程式之時也其書以經傳之事同辭異者求其常
變察其詳略以經覈傳以傳考經蓋亦比事屬辭
之遺意專為場屋進取而作也

楊維禎春秋合題著說三卷

維禎字廉夫號鐵崖山陰人泰定進士為建德總管
府推官擢江西儒學提舉未及上而兵亂遂不復仕
明初命修禮樂書旋以老病辭歸事蹟具明史文苑

傳

俞臯春秋集傳釋義大成十二卷

臯字心遠新安人

臯自序凡例曰自晉杜氏注左傳始有凡例之說
取經之事同辭同者計其數凡若干而不考其義
唐陸氏學於啖趙作纂例之書雖分析詳備然亦
未嘗以義言之逮程子為傳分別義例學者始得
聞焉愚遵程子說以事同辭同義同者定為例十

六條凡經之書事義如此而其辭例如此者是所謂例也其有義不同而辭同事同而辭不同者則見各事之下非可以例拘也且如殊會其辭雖同而其義則不同會王世子而殊會是尊之而不敢與抗若曰王世子在是而諸侯往會之不敢與世子之列也會吳而殊會是抑之而不使其抗若曰諸侯自為會而後會吳不使諸侯列也又如歸與來歸復歸歸字雖同而其意則不同婦人謂嫁曰

歸而書來歸則出也諸國君大夫出奔而復則書
歸而書復歸則義不當復也天王使宰咺來歸惠
公仲子之賵秦人來歸僖公成風之隧則譏其過
時始至之失也至於季子來歸齊人來歸鄆謹龜
陰田此又喜其歸異其詞以嘉之也凡此皆辭同
而義不同者也又如國君奔一也而內奔書遜弑
君一也而內弑書薨不地殺公子一也而內殺公
子書刺凡此皆事同而辭不同者也又如易田書

假城虎牢不繫鄭戍虎牢曰鄭因會伐而朝書如
凡此之類乃程子所謂微詞隱義時措咸宜者也
是皆不可以例拘也學者誠能熟玩程子傳以求
其意至於沉潛反復一旦豁然貫通庶乎可窺聖
人用心之萬一也

錢曾曰先取各家注釋以己意採集於前申之以
程子之言後詳列三傳胡氏傳使人得備覽而詳
繹其說元刻中之佳者

李廉春秋諸傳會通二十四卷

廉字行簡廬陵人擢進士知信豐縣遇寇亂殉節

廉自序略曰傳春秋者三家左氏事詳而義疏公
穀義精而事略有不能相通兩漢專門各守師說
至唐啖趙始合三家所長務以通經為主陸氏纂
集已為小成宋河南程夫子始以廣大精微之學
發明奧意真有以得筆削之心而深有取於啖趙
良有以也高宗紹興初武夷胡氏進講篤意此經

於是承詔作傳事按左氏義取公穀之精大綱本
孟子主程氏而集大成矣方今取士用三傳及胡
氏誠不易之法然四家之外如陳氏後傳張氏集
註皆為全書學者所當考而孫氏之發微劉氏之
意林權衡呂氏之集解與其餘諸家之議論亦不
可以不究於是盡取諸傳薈萃成編先左氏事之
案也次公穀傳經之始也次杜氏何氏范氏三傳
專門也次疏義釋所疑也總之以胡氏貴斷也陳

張並列擇所長也而又備採諸儒成說及諸傳記
略加梳剔於異同是非始末之際每究心焉謂之
春秋諸傳會

楊士奇跋曰明修元史時知行簡者無在朝故不
得列之史傳世之知者少其於春秋不徒能明之
蓋煒然有光科目者也

王元杰春秋讞義九卷

元杰字子英吳江人至正間領鄉薦以兵興不仕教

授鄉里以終

鄭玉春秋闕疑四十五卷

玉字子美歙人至正中除翰林待制不赴元末城破
自經事蹟詳元史忠義傳

玉自序略曰因朱子通鑑綱目之例以經為綱大
字揭之於上復以傳為目小字疏之於下叙事則
專於左氏而附以公穀合於經者則取之立論則
先於公穀而參以歷代諸儒之說合於理者則取

之其或經有脫誤無從質證則寧闕之以俟知者
而不敢強為訓解傳有不同無所考據則寧兩存
之而不敢妄為去取至於誅討之事尤不敢輕信
傳文曲為附會必欲獄得其情事得其實則以經
之所作由於斯也聖人之經詞簡義奧與其強通
其所不可通以取譏於當世孰若闕其所當闕以
俟知於後人程子謂春秋大義數十炳如日星豈
無可明之義朱子謂起頭一句春王正月便不可

解固有當闕之疑某之為是書也折衷二說而為之義例殆以便檢閱備遺忘而已

徐尊生曰讀春秋集傳闕疑序知先生所以著述之意甚公且平世儒說春秋其病皆在不能闕疑而欲鑿空杜撰是以說愈巧而聖人之心愈不可見也

齊履謙春秋諸國統紀六卷

履謙字伯恒大名入官至太史院使

履謙自序略曰墨子曰吾見百國春秋又嘗考之
古文有夏商春秋又有晉春秋國語晉羊舌肸習
於春秋悼公使傳其太子楚莊王使申叔時傳太
子箴教之春秋左傳韓宣子適魯見魯春秋至於
後世史學亦多以春秋名其書者若虞卿春秋呂
氏春秋陸賈春秋吳越春秋漢魏春秋唐春秋之
類往往有之故知春秋者古史記之通稱而今之
春秋一經聖人以同會異以一統萬之書也始魯

終吳合二十國史記而為之也然自三傳既分世
之學者類皆務以褒貶為工至於諸國分合與夫
春秋之所以為春秋未聞其有及之者予竊疑之
久矣暇日輒以所見妄為叙類私之巾篋蓋不惟
有以備諸家之闕庶幾全經之綱領自此或可以
尋究云

陳則通春秋提綱十卷

則通字鐵山始末無攷

盱江胡光世序略曰春秋一經說者無慮數十百家此篇隳括諸傳包舉無遺頗於聖人之意若滄海之有畔可以濟其濶而極其際至於編中之所本者則有諸傳在熟讀傳以求經之旨而於此編以發經之蘊信所謂提綱者矣

趙汴春秋集傳十五卷 春秋屬辭十五卷 春秋左氏傳補註十卷 春秋師說三卷 春秋金鎖匙一卷
汴見易類

訪自序集傳略曰春秋聖人經世之書也書成一歲而孔子卒當時弟子蓋僅有得其傳者歷戰國秦漢以及近代說者殆數十百家其深知聖人制作之原者鄒孟氏而已孟氏之言曰王者之迹熄而詩亡詩亡然後春秋作此孔門傳春秋學者之微言也蓋周雖失政而先王詩書禮樂之教結於民心者未泯故善有美而惡有刺迨其極也三綱失序而上下相忘怨刺不作則文武成康治教之

迹始湮沒無餘矣夫世變如此而春秋不作則人心將安所底止乎故曰詩亡然後春秋作隱桓之世王室日卑齊伯肇興春秋所由始也定哀之世中國日衰晉伯攸廢春秋所由終也方天命在周未改而上無天子下無方伯桓文之事不可誣也是以聖人詳焉故曰其事則齊桓晉文古者列國皆有史官掌記一國之事春秋魯史策書也事之得書不得書有周公遺法焉太史氏掌之非他人

之所得議也孔子魯司寇也一旦取太史氏所職而修之魯之君臣其能無惑志歟然則將如之何凡史所書有筆有削史所不書則不加益也故曰其文則史史主實錄而已春秋志存撥亂筆則筆削則削游夏不能贊一辭非史氏所及也故曰其義則丘竊取之矣此制作之原也然自孟氏以來鮮有能推是說以論春秋者蓋其失由三傳始左氏有見於史其所發皆史例也故常主史以釋經

是不知筆削之有義也公羊穀梁有見於經其所傳者猶有經之佚義焉故據經以生義是不知其文之則史也後之學者於三傳無所師承莫能相一其有兼取三傳者則臆決無據流遁失中其厭於尋繹者則欲盡舍三傳直究遺經分異乖離莫知統紀至永嘉陳君舉始用二家之說參之左氏以其所不書實其所書以其所書推見其所不書為得學春秋之要然其所蔽則遂以左氏所錄為

魯史舊文而不知策書有體夫子所據以加筆削
左氏亦未之見也左氏書首所載不書之例皆史
法非筆削之旨公穀每難疑以不書發義實與左
氏異師陳氏合而求之失其本矣故於左氏所錄
而經不書者皆以為夫子所削則其不合於聖經
者亦多矣由不考孟氏而昧夫制作之原也蓋常
論之策書之例十有五而筆削之義有八策書之
例一曰君舉必書非君命不書二曰公即位不行

其禮不書三曰納幣逆夫人夫人至夫人歸皆書
四曰君夫人薨不成喪不書葬不用夫人禮則書
卒君見弑則諱而書薨五曰適子生則書公子大
夫在位書卒六曰公女嫁為諸侯夫人納幣來逆
女歸娣歸來媵致女卒葬來歸皆書為大夫妻則
止書來逆七曰時祀時田苟過時起禮則書軍賦
改作踰制亦書此史氏之錄乎內者也八曰諸侯
告則書卒不討則不書雖及滅國滅不告敗勝不

告克不書九曰雖伯主之役令不及魯亦不書十
曰凡諸侯之女行惟王后書適諸侯雖告不書十
一曰諸侯之大夫奔有玉帛之使則告告則書此
史氏之錄乎外者也十二曰凡天子之命無不書
王臣有事為諸侯則以內辭書之十三曰大夫已
命書名氏未命書名微者名氏不書止書其事外
微者書人十四曰將尊師少稱將將卑師衆稱師
將尊師衆稱某師師君自將不言師師十五曰凡

天灾物異無不書外灾告則書此史氏之通錄乎
內外者也筆削之義一曰存策書之大體凡策書
大體曰天道曰王事曰土功曰公即位曰逆夫人
夫人至庶子生曰公夫人外如曰薨葬曰孫曰夫
人歸曰內女卒葬曰來歸曰夫人公子卒曰公夫
人出疆曰盟會曰出師曰國受兵曰祭祀蒐狩越禮
軍賦改作踰制外諸侯卒葬曰兩君之好曰玉帛
之使凡此類之書於策者皆不削也春秋魯史也

策書之大體吾不與易焉以為猶魯春秋也二曰
假筆削以行權春秋撥亂經世而史有恒體有書
有不書以互顯其義書者筆之不書者削之其筆
削大凡有五或略同以存異公行不書至之類也
或略常以明變釋不朝正內女歸寧之類也或略
彼以見此以來歸為義則不書歸以出奔為義則
殺之不書之類也或略是以著非諸侯有罪及勤
王復辟不書之類也或略輕以見重非有關於天

下之故不悉書是也三曰變文以示義春秋雖有
筆有削而所書者皆從主人之辭然有事同而文
異者有文同而事異者則予奪無章而是非不著
於是有變文之法焉將使學者即其文之異同詳
略以求之則可別嫌疑明是非矣四曰辨名實之
際亦變文也正必書王諸侯稱爵大夫稱名氏四
裔雖大皆稱子此春秋之名也諸侯不王而伯者
興中國無伯而荆楚橫大夫專兵而諸侯散此春

秋之實也。於是去名以全實者，征伐在諸侯，則大夫將不稱名氏。中國有伯，則楚君侵伐不稱君。又有去名以責實者，諸侯無王，則正不書王。中國無伯，則諸侯不序君。大夫將略其恒稱，則稱人。五曰謹。內外之辨亦變文也。楚至東周，僭王猾夏，故伯者之與以攘郤為功。自晉伯中衰，楚益侵凌中國，甚至假討賊之義以號令天下，知有楚而已。故春秋書楚事無一不致其嚴者，而書吳越與。

徐亦必與中國異辭所以伸大義於天下也六曰
特筆以正名筆削不足以盡義而後有變文然禍
亂既極大分不明雖變文猶不足盡義而後聖人
加之特筆所以正名分也夫變文雖有損益猶曰
史氏恒辭若特筆則辭旨卓異非復史氏恒辭矣
七曰因日月以明類上下內外之無別天道人事
之反常六者尚不能盡見則又假日月之法區而
別之大義以日為詳則以不日為略以月為詳則

以不月為略其以日為恒則以不日為變以不日
為恒則以日為變甚則以不月為異其以月為恒
則以不月為變以不月為恒則以月為變甚則以
日為異將使屬辭比事以求之則筆削變文特筆
既各以類明而日月又相為經緯無微不顯矣八
曰辭從主人主人謂魯君也春秋本魯史成書夫
子作經惟以筆削見義自非有所是正皆從史氏
舊文而所是正亦不多見故曰辭從主人此八者

實制作之權衡也然聖人議而弗辨是非之心人皆有之善而見錄則為褒惡而見錄則為貶其褒貶皆千萬世人心之公也聖人何容心哉辭足以明義斯已矣是故知存策書之大體而治乎內者恒異乎外也則謂之夫子法書者不足以言春秋矣知假筆削以行權而治乎外者恒異乎內也則謂之實錄者不足以言春秋矣知一經之體要議而弗辨則凡謂春秋賞人之功罰人之罪去人之

族黜人之爵褒而字之貶而名之者亦不足以論
聖人矣故學者必知策書之例然後筆削之義可
求筆削之義既明則凡以虛辭說經者其刻深辨
詰之說皆不攻自破然後春秋經世之道可得而
明矣雖然使非孟氏之遺言尚在則亦安能追求
聖人之意於千百年之上哉洴自早歲獲聞資中
黃楚望先生論五經旨要於春秋以求書法為先
謂有魯史書法有聖人書法在學者自思而得之

於是思之十有餘年卒有得於孟氏之言因其說以考三傳及諸家陳氏之書具知其得失異同之故乃輯錄為書名曰春秋集傳凡十五卷尚意學者溺於所聞不能無惑別撰屬辭八篇發其隱蔽傳諸同志焉

朱彝尊曰東山環谷二先生俱以經學重尤精研春秋環谷守康侯之說東山學於黃楚望首闢夏時冠周月之非不相雷同

錢曾曰子常游楚望之門得益春秋為多故次其師說十一篇以成是書楚望云學春秋當以三傳為主而三傳之中又當據左氏事實以求聖人旨意之所歸蓋其中自有脈絡可尋人自不肯細意推求耳旨哉斯語一洗唐宋來舍傳求經之妄論矣

臣等謹案汭所輯左傳補注稟其師黃澤之說謂春秋本源脈絡盡在左傳而後世說春秋者惟杜

預註陳傅良章旨最有據依因反覆辨討出入百家究其得失取陳氏章旨附於杜註之下去短集長而補其所不及其微詞奧義註有未備者頗採孔穎達之疏暢述之其所輯師說皆取其師黃澤所著發明疑義諸條汙為編次之凡十一篇分三卷又附錄上下二卷錄澤所為詩及文與已所為澤行狀足與師說相發明也其所輯屬辭欲學者由春秋之教以求制作之原制作之原既得而後

聖人經世之義可言因為離經析義分別條目創
為八類辨而釋之成八篇篇各有序共十五卷殫
精畢慮凡二十年而成至其集傳一書蓋兩易其
藁也始元至正戊子初作集傳迨後屬辭成義精
例密以集傳所列經義史法猶有未備更須討論
且謂屬詞特推筆削之權而集傳大明經世之志
必二書相表裏而後春秋之旨方完壬寅後乃重
更定其書至昭公二十七年嬰疾遂輟筆洪武已

酉冬卒其門人倪尚誼援汴之義續成之而其書
藏弄人不及見嘉靖中提學御史東阿劉隅按徽
下令索之以原本藏於學宮更屬教諭夏鏜訂刊
傳世

汪克寬春秋胡傳附錄纂疏三十卷

克寬見易類

克寬論曰春秋紀事大而天地日星人倫邦國小
而宮室器幣草木禽蟲凡天下萬物之理無不具

焉能通是經則理無不窮矣故楊子曰說理者莫
辨乎春秋

臣等謹案克寬附錄纂疏以胡安國為主而博采
衆說薈萃成書成於順帝至元中汪澤民虞集各
有序明初纂春秋大全全用其書

晏兼善春秋透天關四卷

兼善里貫無攷

麟經指南一卷

不著撰人名氏

春秋圖說

無卷數

不著撰人名氏

春秋四傳三十八卷

不著編輯者名氏

欽定續文獻通考卷一百五十三

欽定四庫全書

欽定續文獻通考卷一百五十四

經籍考

經 春秋

明

張以寧春王正月考二卷

以寧字志通古田人元泰定進士官至翰林侍讀學士知制誥入明仍故官洪武二年奉使冊封安南王

還卒于道事迹具明史文苑傳

石光霽春秋鉤元

無卷數

光霽字仲漁泰州人從張以寧學洪武十三年以薦為國子監學正擢春秋博士明史文苑傳附載張以寧傳中

春秋大全七十卷

永樂中胡廣等奉勅撰

饒秉鑑春秋提要四卷

東鑑字憲章號雯峯廣昌人正統舉人官至廉州府知府

邵寶左鵠一卷

寶字國賢號二泉無錫人成化進士官至南京禮部尚書卒謚文莊事蹟具明史儒林傳

童品春秋經傳辨疑一卷

品字廷式號慎齋蘭溪人弘治進士官至兵部員外郎

魏校春秋經世一卷

校見禮類

呂柟春秋說志五卷

柟見易類

鍾芳春秋集要十二卷

芳字仲實瓊山人正德進士官至戶部侍郎

季本春秋私攷三十六卷

本見易類

豐坊春秋世學三十二卷

坊見易類

唐樞春秋讀意一卷

樞見易類

熊過春秋明志錄十二卷

過見易類

唐恒春秋錄疑十六卷

恒字志貞晉江人嘉靖進士官至姚安府知府

高拱春秋正旨一卷

拱字肅卿新鄭人嘉靖進士官至吏部尚書中樞殿

大學士謚文襄

徐學謨春秋億六卷

學謨字叔明嘉定人嘉靖進士官至禮部尚書

姜寶春秋事義全攷十六卷

寶見易類

袁仁春秋胡傳考誤一卷

仁見書類

黃正憲春秋翼附二十卷

正憲見易類

臣等謹案正憲論僖公二十八年晉伐曹衛云是時諸侯俱已事楚獨宋尚存而今已受圍晉所恃以協力排楚者齊秦二大國而已而二國之師又未能遽至於是潛掠曹境以搖四國之心聲言伐衛以致楚救及楚救衛晉又不與戰而入曹不過

使楚人兩地奔馳寬緩時日以待齊秦之至也又
論僖公三十二年秦人入滑云秦雖係顓頊之後
然棄禮義尚戰功未免西戎習氣自晉文藉其力
以勝楚始通盟會抑楚以興秦有拒虎進狼之意
當其與晉圍鄭棄盟而去已有藐晉爭雄之心使
秦得志于鄭乘勝長驅諸侯必有再受其毒者是
役也謀洩于滑師敗于殺秦師于是不敢東下然
秦晉讐殺者四五世于是晉力稍疲而楚復橫矣

[illegible]

倉猝無措然則致此敗者豈可專歸咎于先穀乎
邲一敗而楚滅蕭圍宋勢益橫行矣此皆洞見情
勢之談也

鄒德溥春秋匡解六卷

德溥見易類

嚴訥春秋國華十七卷

訥字敏卿常熟人嘉靖進士官至吏部尚書武英殿
大學士謚文靖

陸粲左傳附註五卷 左氏春秋鐫二卷 春秋胡氏

傳辨疑二卷

粲字子餘長洲人嘉靖進士官工科給事中劾張璁桂萼謫驛丞遷知永新縣

臣等謹案粲讀左氏註疏及經典釋文於訓詁旁
切可疑者輒以已見及他書之說可證據者附註
其下曰左傳附註又以左氏非左邱明其言亦卑
淺不中于道疑戰國時人所為因之為鐫以曉示

學者曰左氏鑄其辨疑則摘胡傳之疑者以析之也

馮時可左氏釋二卷 左氏討一卷 左氏論一卷

時可字敏卿號元成華亭人隆慶進士官至湖廣布政司參政

黃虞稷曰討不如論論不如釋

傅遜左傳屬事二十卷 左傳註解辨誤二卷

遜字士凱太倉人從歸有光學以歲貢授建昌訓導

臣等謹案左傳屬事做宋袁樞通鑑紀事本末為之更加考注以訂杜氏之訛每一事竟復論其人所以得失成敗其註解辨誤會衆說以折衷之杜注之誤有未經辨議亦創以己意為之釐革

徐浦春秋四傳私考十三卷

浦字伯源浦城人官監察御史

郝敬春秋直解十五卷

敬見易類

臣等謹案敬論僖公四年齊桓召陵之盟先儒最稱之其辭曰桓公稱霸二十餘年諸侯力能抗齊不受盟者惟秦與楚秦遠而楚近楚屈則東諸侯震而齊益張故桓公拳拳以楚為事而心又畏楚之強也又期于勝而萬不可敗也先舉蔡嘗楚以示諸侯而次于陘夫次陘則無必進之志矣使齊果能討楚于楚使來當先問其稱王問其伐鄭問其虜蔡侯之罪有辭止無辭進服則止不服則進

此堂堂問罪之師矣釋此不言支吾遠引句茅不
貢昭王不復是明借以易託之辭惟恐逢彼之怒
至戰而勝負未可知也陳師以出未踐郢郊未覲
楚子僅僅屈完一盟遂振旅歸楚亦有以微窺其
意而姑與之盟歸未逾年而楚滅弦矣逾年又圍
許矣自召陵後同盟有事楚未聞遣一介一旅以
從嗣是而楚勢益橫也齊方釀楚之橫而何云服
楚耶

曹學佺春秋闡義十二卷

學佺見易類

高攀龍春秋孔義十二卷

攀龍見易類

攀龍兄子世泰序略曰我伯父忠憲公有春秋孔義之書凡經無傳有者不敢信也經有傳無者不敢疑也其文簡其意覈有嚴正之義有忠恕之仁有疑闕之慎願以孔義欲誦法孔子者為聖人之

徒也

卓爾康春秋辨義三十九卷

爾康見易類

爾康自序略曰辨義者一曰經義二曰傳義三曰書義四曰不書義五曰時義六曰地義

湛若水春秋正傳三十七卷

若水見禮類

臣等謹案若水正諸傳之謬而歸之于正故曰正

傳如隱公八年秋七月宋公齊侯衛侯盟瓦屋左
傳以為禮穀梁以為謹而曰若水正之曰古者天
下為公會同之禮制于天子無上命而私盟無道
之甚者也故書而紀之日與不日史記有詳略聖
人遂因之而不削耳又如莊公五年秋鄭黎來來
朝三傳皆以為未受王命若水正之曰已朝王也
史未之傳焉耳觀王命以為小邾可見其朝矣凡
此諸儒皆避其說

王樵春秋輯傳十三卷 春秋凡例二卷

樵見書類

臣等謹案樵說春秋其有裨于經者如隱公九年
冬會防樵云是時未有霸也而已為霸之漸前此
惟兩君相會至此而參會矣前此惟敵國相攻至
此而連諸侯伐宋矣自參盟而有主盟自連諸侯
而遂樓諸侯以伐諸侯故五霸三王之罪人也而
放恣之諸侯又五霸之罪人也此春秋之大旨也

又莊公二十七年秋公子友如陳葬原仲樵云此直書其事不待貶而義自見者也胡傳謂季子私行而無貶者乃春秋端本之意謂王臣私交而始亂末流乃至大夫交政于國中若諸侯大夫則無譏非經本旨此皆得春秋之正者

朱睦㮮春秋諸傳辨疑四卷

睦㮮見易類

瞿九思春秋以俟錄一卷

九思字睿夫黃梅人萬厯中舉人為張維翰誣構謫
戍張居正援之得釋後以薦授翰林待詔不赴事蹟
具明史文苑傳

姚舜牧春秋疑問十二卷

舜牧見易類

陳懿典讀左漫筆一卷

懿典字孟常秀水人萬厯進士官至中允乞假歸崇
禎初起為少詹事不赴

張杞麟經統一篇十二卷

杞字成夫湖州人萬厯中舉人官福清縣教諭

余敷中春秋麟寶六十三卷

敷中不知何許人前有萬厯乙卯自序

鄭鈺春秋心印十四卷

鈺上海人萬厯中由貢生官青田縣訓導

王震春秋左翼四十三卷

經義考作
左傳參同

震字子省烏程人萬厯中舉人

朱彝尊曰烏程王氏左傳參同四十三卷別有凡
例列國世系考國號考異年表世次圖名號歸一
圖名號考異字例書目姓氏附見于前後其報沈
太史仲潤書云人謂僕變亂左氏非敢然也僕所
謂編輯者不過因其散亂而次第之或緣其記識
闕略而補苴之如齊桓公遷邢于夷儀封衛于楚
邱此是僖公元年二年事也傳乃載于閔公末年
當乎否耶又如晉獻公殺世子申生本僖公五年

事也傳乃散見于莊公閔公僖公二三十年之間
考核者便乎否耶至如管仲匡合之功孔子亟稱
之然左氏不詳見也管子于召陵之役則曰楚人
攻宋鄭燒燔燬使城壞者不得復築也屋之燒者
不得復葺也要宋田塞兩川使水不得東流東山
之西水流滅桅四百里而後可田也于是興兵南
存宋鄭茲亦不見桓公管仲之仁矣乎令尹子文
之忠孔子嘉之左氏未之及也國語則曰子文緇

衣以朝鹿裘以處未明而入朝日晦而歸食家無
一日之積茲亦不見子文之徇公矣乎三都之隳
聖人施為大略具見于此經文大書屢書必自有
說左氏僅曰仲由為季氏宰將隳三都抑何略也
家語則云孔子言于公曰古者家不藏甲大夫無
百雉之城今三家過制請損之此出自聖人隳郕
隳費之本意傳何可不載至西狩獲麟聖經于此
絕筆原有深意左氏乃曰叔孫氏之車子鉏商獲

麟以為不祥賜虞人仲尼觀之曰麟也然後取之
其于經義惡覩萬一家語紀孔子之言則曰麟之
至為明王也出非其時而被害是以悲之此出自
聖人絕筆至情又何嫌攪入己之所增益大都不
出此類獨左逸說林等書謬為纂附疑于真偽錯
雜然鄙意傳疏主于明經苟于經義有裨雖附見
無傷也矧細書傳後原與本傳毫無混淆又何真
偽錯雜之可疑乎此書出讀者可省檢閱覆覈之

勞其于初學不無小補聖人蓋云屬辭比事春秋
教也僕之編輯倘亦屬比之萬一乎其著書大略

具見此書

凌稚隆左傳評注測義七十卷

稚隆字以棟號磊泉烏程人萬厯時貢生

鄭良弼春秋續義發微十二卷

良弼字子宗號肖巖淳安人萬厯中舉人

楊于庭春秋質疑十二卷

于庭字道行全椒人萬厯進士官兵部職方司郎中
陳許廷春秋左傳典略十二卷

許廷字靈茂海鹽人萬厯中諸生以薦授兵部司務
王道琨趙如源同編左傳杜林合註五十卷

道琨杭州人天啟舉人如源字濬之亦杭州人

朱朝英讀春秋略記十卷

朝英見易類

王介之春秋四傳質二卷

介之字石崖衡陽人

鄧來鸞春秋實錄十二卷

來鸞字繡青宜黃人天啟進士官至武昌府知府

黃道周春秋揆一卷

道周見易類

張溥春秋三書三十三卷

溥見詩類

張采序略曰三書者張子讀春秋所作也曷云三

書一曰列國論是則張子分之以明經一曰諸傳
斷是則張子合之以明經一曰書法解是則張子
分合一致以明經張子沒就所屬稿列國論已完
傳斷中缺文公復缺襄公以下其僖公間缺十餘
年書法解為目多端而僅成一則賈人強予續之
不自量許其請病不克竟因先完僖公出正同志
其他所缺亦小有條緒

劉城春秋左傳地名錄二卷

城字伯宗貴池人崇禎中貢生

顧懋樊春秋義三十卷

懋樊見易類

馮夢龍春秋衡庫三十卷 別本春秋大全三十卷

夢龍字猶龍吳縣人崇禎時以貢生知壽寧縣事

陳士芳春秋四傳通辭十二卷 通辭藝文畧作通解

士芳字清佩海寧人

朱之俊春秋纂

無卷數

之俊見易類

陳于鼎麟旨定

無卷數

于鼎字爾新宜興人

王寢大春秋說三十卷附錄三卷

寢大字幼章合肥人崇禎進士

寢大自序略曰春秋本魯史原文孔子修之蓋筆

削史文以見義非變史文以起義自說經者不舉

大義而求之名字爵號日月及會盟之類以為義

例蓋昉于公穀盛于胡氏詮說愈繁而經學愈亂
故著是書以破諸公之言書法者

鍾評左傳三十卷

毛晉汲古閣所刻鍾惺評點

夏元彬麟傳統宗十三卷

元彬本名彪字仲弢德清人

梅之煥春秋因是三十卷

之煥字惠連麻城人

施天遇春秋三傳衷考十二卷

天遇字昌辰武康人

春秋年考一卷

不著撰人名氏



欽定續文獻通考卷一百五十四

欽定四庫全書

史部

欽定續文獻通考卷一百

五十五至
六十

給事中_臣劉芬覆勘

總校官內閣中書_臣孫溶

欽定四庫全書

欽定續文獻通考卷一百五十五

經籍考

經論語 孟子

宋史藝文志論語類七十三部五百七十九卷

不著錄者八部

八十卷 儒家類中孟子三十部三百二十六卷

遼金元三史不立藝文志散見各紀傳中

明史藝文志論語類五部六十六卷孟子類二部十一

卷

宋

鄭汝諧論語意原二卷

汝諧字舜舉號東谷處州人仕至吏部侍郎

真德秀曰意原以其已意而逆聖人之志盖多得之八佾篇謂其傷權臣之僭竊痛名分之紊亂大指與春秋相表裏於子賤章謂其為人沈厚簡重非魯多君子不能取以為君子於聞韶章謂以揖

遜之樂作於僭竊之國聖人蓋傷之於三仁章謂
微子之去為去王朝而之國非歸周也若是者不
可殫書其言若異於先儒而未嘗不合乎義理之
正

臣等謹案馬考載論語意原一卷引陳振孫書錄
解題云不知作者茲以其卷數不同復不著撰人
疑或別是一書仍著錄焉

蔡節論語集說十卷

節字覺庵永嘉人淳祐間官太府卿兼樞密副都承旨

姜文龍曰永嘉蔡先生集說之作自集義中來本之明道伊川二先生參以晦菴或問而于晦菴南軒尤得其骨髓蓋南軒學于五峯先生又與晦菴相講磨故語說多親切

納喇性德曰是書宋藝文志不載諸家藏書目俱不收予購得之幸矣永嘉自伊洛諸儒未作王景

山出發明經蘊述儒志一編其後則有劉安節元
承鮑若雨商霖謝天甲用休潘旻子文周行已恭
叔陳經正貴一暨弟經邦貴叙其姓名皆入伊洛
淵源錄中而著羣經說者若陳鵬飛少南薛季宣
士龍張淳忠甫葉適正則戴溪肖望陳傳良君舉
葉味道知道錢文子文季黃仲炎若晦湯達達可
陳埴潛室王與之次點皆有成書著錄諺曰溫居
瀛壖理學之淵不信然與

黃虞稷曰是書淳祐五年表進

金履祥論語集註考證十卷

履祥見書類

明

陳士元論語類考二十卷

士元見易類

士元自序略曰論語者孔子答弟子時人及弟子

相與言而所聞於孔子之語也論語識謂子夏等

六十四人撰鄭康成謂仲弓游夏輩撰而程正叔
以為成於有子曾子之門人洪景廬又謂蕙成於
閔子之門人云其書古論二十一篇齊論二十二
篇魯論二十篇漢孝文置論語博士平帝召通論
語者駕軺詣京師蓋慎其選而重茲科也張禹本
受魯論兼講齊論合而考之刪其煩複主魯論二
十篇除齊論問王知道二篇稱為張侯論今所傳
論語是已齊古二學遂不傳明興設科取士初試

七藝論語居先而世之學者幼時即承斯業及從
政為邦則目為筌蹄不復省覽予於是蓋病焉昔
人有言論語始於不愠終於知命為君子儒洙泗
為仁之方一貫之道可終身違乎予素檮昧有一
得輒出入口耳間乃著此編貯之右塾凡二十卷
為類十有八目四百九十有四云論語八十策較
六經之策三居二聘禮疏可稽也傳錄者誤為八
十宗徐遵明曲為之解為王應麟所詆謂予茲曲

解不止八十宗三言耳其不免覽者詆誚哉

王肯堂論語義府二十卷

肯堂見書類

王綱振曰損菴先生裒集先儒語錄下及近儒諸說經者凡數百家名曰義府論語最先脫稿計四

十餘萬言

周宗建論語商二卷

宗建字季侯吳江人萬厯進士官至監察御史巡按

湖廣為魏忠賢所害崇禎初追贈太僕寺卿謚忠毅
繆永曰論語商二卷成於武康官廨

劉宗周論語學案

無卷數

宗周見易類

右論語

宋

蘇評孟子二卷

舊題蘇洵評

臣等謹案是書詞意庸淺當是依託之作

蔡模孟子集疏十四卷

模字仲覺號覺軒建安人蔡沈之子蔡杭之兄也

蔡杭後序略曰紫陽朱子集諸儒之大成論孟二

書有集義以發其所疑有或問以別其所異而集

註出焉杭王父西山府君在師門最久先君子九

峯府君世師師學得于問辨講明為尤詳伯氏覺

軒語及過庭舊聞慨然旁搜博取以就先志九年

究心於是參或問以見同異采集義以補缺遺文集則以剖決而無隱語錄則以講辨而益精至兩世所見聞門人所敷繹有足以發越朱子言外之意者會而通之故觀集疏而集注之意易見

納喇性德曰牧堂蔡仲與朱子稱其教子不干利祿而開之以聖賢之學非世人所及其子元定季通孫淵伯靜沉仲默曾孫模仲覺抗仲節皆隱居著書既而仲覺任建安書院席長以謝方叔湯恢

薦補迪功郎添差本州教授而仲節旋中進士為
諸王教授累遷端明殿學士參知政事蔡氏撰述
李通律呂新書仲默書傳最著而伯靜易訓解鄒
陽董氏載入諸儒沿革中仲覺則有易傳集解大
學衍論語孟子集疏河洛探賾續近思錄諸書予
所見者僅孟子集疏十四卷而已仲節為之後序
稱其參或問以見同異采集義以補闕遺洵有功
於集注者矣仲覺被薦嘗疏言敬義為萬世帝王

心學之本而大雅介人維藩六語為國家守邦要
道又請以白鹿洞學規頌諸天下蓋無愧牧堂老
人之教而其家學誠非世人所能幾及也

施德操孟子發題一卷

德操字彥執海昌人以病廢不能婚宦坎壈而沒

金履祥孟子集註考證七卷

履祥見書類

明

陳士元孟子雜記四卷

士元見易類

管志道孟義訂測七卷

志道字登之婁縣人事蹟附見明史顧鯨傳

郝敬孟子說解十四卷

敬見易類

陸元輔曰郝仲興孟子說解前有讀孟子三十一

條為一卷孟子遺事一卷餘隨文詳說十二卷

右孟子

欽定續文獻通考卷一百五十五

欽定四庫全書

欽定續文獻通考卷一百五十六

經籍考

經
孝經

宋史藝文志孝經類二十六部三十五卷

不著錄者
二部六卷

遼金元三史不立藝文志散見各紀傳中

明史藝文志孝經類三十五部一百二十八卷

宋

朱申孝經句解一卷

申見周禮類

元

吳澄孝經定本一卷

澄見易類

澄自序曰夫子遺言惟大學論語中庸孟子所述醇而不雜此外傳記諸書所載真偽混淆殆難盡信孝經亦其一也竊詳孝經之為書肇自孔曾一

時問答之語今文出於漢初謂悉曾子門人記錄之舊已不可知古文孝經以為秦時孔鮒所藏昭帝時魯國三老始以上獻劉向衛宏蓋嘗手校魏晉以後其書亡失隋時有稱得古文孝經者其間與今文增減異同率不過一二字而文勢曾不若今文之清順以許慎說文所引及桓譚新論所言考證又皆不合決非漢世孔壁中古文也宋大儒司馬公酷尊信之朱子刊誤亦據古文未能識其

何意今觀邢氏疏說則古文之為偽審矣又觀朱子
所論則雖今文亦不無可疑者焉疑其所可疑信
其所可信去其所可去存其所可存朱子意也故
今特因朱子刊誤以今文古文校其同異定為此
本以俟後之君子云

朱鴻曰吳子章句經一章傳十二章其內合五刑
一章去閨門一章刪去古文二百四十六字

董鼎孝經大義一卷

鼎見書類

江直方孝經外傳二十卷

直方字思正蜀人

張萱曰元至元中南充江直方摘孝經指示切要
條為之說仍集經史子集中嘉言善行合經義者
依經分類為之羽翼

明

項霖孝經述註一卷

霽浙江臨海人洪武時為按察司僉事

潘府孝經正吳一卷

府字孔修上虞人成化進士累官太常寺卿事蹟具明史儒林傳

朱鴻曰上虞潘府疑孝經與中庸文體相類首章孔子極言孝道之大以告曾子其下十二章皆推明首章未盡之旨斷非孔子先自作經又自作傳以釋之也因作孝經正誤效中庸章第其序次亦

多牽強

羅汝芳孝經宗旨一卷

汝芳字維德號近谿南城人嘉靖進士累官雲南叅政明史儒林傳附見王畿傳中

臣等謹案傳稱汝芳從永新顏鈞學鈞學釋氏故
汝芳之學亦近釋

黃道周孝經集傳四卷

道周見易類

道周自序略曰臣繹孝經疑義有五著義十二疑義五者因性明教一也追文返質二也貴道德而賤兵刑三也定辟異端四也韋布而享祀五也此五者皆先聖所未著而夫子獨著之其文甚疑十二著者郊廟明堂釋奠齒胄養老耕藉冠昏朝聘喪祭鄉飲酒是也

朱垣曰先生在白雲庫中手寫孝經百二十本本本各別今觀集傳乃以孝經為經以禮記孟子錯

綜為緯與前日鴻本絕不相同

陳有度曰先生嘗言聖賢學問只是一部孝經今
觀集傳以一部禮記為孝經義疏以孟子七篇為
孝經導引其他六籍皆肇是書蓋鄭孔所未發也
孫承澤曰漳浦黃先生孝經集傳以孝經為經以
二戴禮儀禮為疏義錯綜宏博見其苦心讀書

沈珩曰紫陽朱子孝經刊誤因文刪定無所增加
嘗欲掇取他書之言別為外傳以發此經之義而

自謂未敢益若有待焉晚歲修明三禮則以儀禮
為經若二戴記及諸經史所載有及於禮者各附
本經之下惟喪祭二禮未就屬門人黃幹續成之
漳浦黃石齋先生紹明紫陽之意成孝經集傳一
書以孝經為六經之本而儀禮二戴記皆為義疏
他若游夏諸儒及子思孟子所傳備采之謂之大
傳經傳各條之下先生以窮理所得暢厥發明謂
之小傳

姚舜牧孝經疑問一卷

舜牧見易類

熊兆孝經集講一卷

兆泰州人始末無攷

欽定續文獻通考卷一百五十六

欽定四庫全書

欽定續文獻通考卷一百五十七

經籍考

經解 四書

宋史藝文志經解類五十八部七百五十三卷

不著錄者九部

一百四十六卷

遼金元三史不立藝文志散見各紀傳中

明史藝文志諸經類四十三部三十四卷四書類五十

九部七百十二卷

宋

岳珂刊正九經三傳沿革例一卷

珂字肅之號倦翁湯陰人居於嘉興鄂忠武王飛之
孫敷文閣待制霖之子也官至戶部侍郎淮東總領
制置使

張萱曰宋相臺岳珂家塾刊本與九經總例相同

黃仲元四如講稿六卷

仲元字善甫號四如莆田人咸淳進士授國子監典簿不赴宋亡更名淵字天叟號韻鄉老人教授鄉里以終

六經奧論六卷

舊題鄭樵撰樵字漁仲莆田人居夾漈山中因以為號紹興中以薦召對累官樞密院編修事蹟具宋史儒林傳

臣等謹案是書內天文辨一條引及樵說稱夾漈

先生論書一條引朱子語錄且稱朱子之謚必非
樵所著也

明本排字九經直音

無卷數

不著撰人名氏

臣等謹案是書卷首題曰明本者宋時刊板多舉
其地之首一字如建本杭本之類此蓋明州所刊
本即今寧波府也

五經圖六卷

不著撰人名氏

元

熊朋來五經說七卷

朋來字興可南昌人宋咸淳進士仕元為福清縣判
官事蹟具元史儒林傳

陸元輔曰易說一卷詩書說一卷春秋說一卷三
禮說二卷大小戴記說一卷雜說一卷豫章自六
經以至篆韻操法無不精究

何異孫十一經問答五卷

異孫里貫無攷

明

蔣悌生五經蠡測六卷

悌生字叔仁福寧州人洪武初舉明經任本州訓導

周洪謨羣經疑辨錄三卷

洪謨字堯弼四川長寧人正統進士累官禮部尚書

太子少保謚文安

邵寶簡端錄十二卷

寶見春秋類

黃虞稷曰嘉靖四年應天巡撫吳廷舉上終養南
京禮部尚書邵寶簡端錄學史二書以資啟沃詔
下有司

王宗慶五經心義

無卷
數

宗慶見易類

臣等謹案宗慶解易曰議卦書曰說略詩曰衍義

春秋曰斷義禮記曰訓釋共五卷統名曰心義云
王恕石渠意見四卷拾遺二卷補闕一卷

恕見易類

陳深十三經解語四十七卷

深見禮類

蔡汝楠說經劄記六卷

汝楠字子木號白石德清人嘉靖進士累官南京工

部侍郎明史文苑傳附見高叔嗣傳中

陳士元五經異文十一卷

士元見易類

士元自序略曰漢初文字兼行篆隸後世易以今
文予讀十三經注疏及秦漢晉唐書所載經語有
與今文異者輒私識之輯十一卷

鄧元錫五經繹十五卷

元錫字汝極南城人嘉靖舉人萬歷中以翰林待詔
徵未至而卒事迹具明史儒林傳

本傳略曰元錫之學淵源王守仁不盡宗其說時
心學盛行元錫力排之故生平博極羣書而要歸
於六經所著五經繹等書行世

朱睦㮮五經稽疑六卷

睦㮮見春秋類

郝敬談經九卷

敬見易類

周應賓九經考異十二卷附九經逸語一卷

應賓鄞縣人萬厯進士累官禮部尚書

臣等謹案是書所謂九經者以五經四書合而為九非古之所謂九經也

陳耀文經典稽疑二卷

耀文字晦伯確山人萬厯進士官至按察司副使

吳繼仕七經圖七卷

繼仕字公信徽州人

馮保經書音釋二卷

保字永亭號雙林深州人嘉靖中秉筆司禮太監隆慶及萬厯之初最用事事迹具明史宦官傳

孫鑛月峯評經十六卷

鑛字文融號月峯萬厯進士官至南京兵部尚書

許順義六經三注粹抄

無卷數

順義字如齋晉江人

五經纂註五卷

舊題竟陵鍾惺纂註

臣等謹案是書刪節經文謬陋太甚當是書肆託名之本

鄭鄭峯陽草堂說書七卷

鄭號峯陽武進人天啟進士改庶吉士

冒起宗拙存堂經質二卷

起宗字宗起如皋人崇禎進士

蔣鳴玉五經圭約

無卷數

鳴玉字楚珍號中完金壇人崇禎進士官台州府推

官

陳世濟經髓七卷

世濟字學元閩縣人

陳際泰五經讀五卷

際泰見易類

山井鼎七經孟子考文補遺二百六卷

井鼎日本國人書首題西條掌書記山井鼎撰

右經解

宋

真德秀四書集編二十六卷

德秀字希元浦城人慶元進士累官戶部尚書進資政殿學士諡文忠從祀孔子廟庭

劉才之序略曰西山所編中庸大學本之朱子集註附以諸儒問辨間又斷以己意詳采精擇誠後學所願見者已鋟之梓為行其傳惟論孟二書闕焉叩之庭間則云已經點校但未編集是論孟固

未嘗無成書也一旦論諸堂上學正劉樸谿承謂
讀書記中所載論並與今所刊中庸大學凡例同
其他如文集衍義等書亦有可採摭者因勉其彙
集成書至是西山所編之四書為大全不惟有以
成西山點校之初志抑使天下學者得是書而讀
之皆曰自吾建學始庶知沿流而溯源夫豈小補云哉
或問小註三十六卷

舊題朱子撰

臣等謹案是書宋以來皆不著錄諸儒傳朱子之學者亦無一人言及之康熙壬午始有陳彝則家刻本稱名徐方廣所增註鄭任鑰又為重刊而附以已說併作後序反覆力辨信為朱子書馬考載朱子之言曰集註後來改定處多遂與或問不相應又無工夫修得云云是或問尚未暇改何暇又作小註殆近人所依託也

四書問目

無卷數

舊題考亭朱元晦先生講授門人雲莊劉鑰睦堂劉炳述記前有永樂壬寅其九世孫劉文序

臣等謹案朱彝尊經義考劉鑰有四書集成劉炳有四書問目並註已佚則問目獨出於炳不應兼題鑰名又劉文序自述嘗任豐城尉攷豐城縣志載明一代典史六十三人亦無所謂建陽劉文殆亦其後人所依託也

錢時四書管見十三卷

時見書類

朱彞尊曰錢氏四書管見有孝經而無孟子與朱子所定四書不同

趙順孫四書纂疏二十六卷

順孫字和仲號格菴縉雲人度宗時官資政殿大學士福建安撫使

順孫自序略曰朱子四書註釋其意精密其語簡嚴渾然猶經也因編取朱子諸書及諸門人講解

有可發明注意者悉彙注下以便觀省名曰纂疏
洪天錫序曰朱子於論孟既成集義又作詳說既
約其精者為集注又疏其所以去取之意為或問
其後集注日以精密而或問遂不復修文公自謂
集注乃集義之精一字稱輕等重不可增減格庵
趙公又取文公口授及門人私淑與集注相發明
者纂而疏之間以所聞附於後如援先儒與諸家
之說有隨文直解不以先後為高下者有二說俱

通終以前說為正者有二說相須其義始備不可分先後者此纂疏所以有功於後學也

納喇性德曰格庵趙氏四書纂疏共二十卷前有清源洪天錫序而陵陽牟子才又分序之其書一以朱子為歸不雜異論於大學中庸先之以章句次以或問間以所聞附其後又以語錄暨諸儒發明大義者註其下於論語孟子則一本集註而采或問集義詳說語錄所載分註焉昔朱子之為章

句也大學則宗程子會衆說而折其中中庸則以
已意分之復取石子重集解刪其繁名以輯略其為
集註也取二程張范二呂謝游楊侯尹十一家之
說輯為要義更名曰精義載更集義又本註疏叅
說并會諸家之言為訓蒙口義更名曰詳說然後
約其精粹為集註而于集註章句之外記其所辯
論取舍之意別為或問若是其嚴密也朱子自言
集註如等上稱來無異不高不低又言添減一字

不得然學者非由集義詳說或問語錄以觀其全無
由審章句集註之精粹則是書之有功于朱子多矣
黃潛作阡表曰公父少傅衛公雷師事考亭門人
滕先生璘授以尊所聞集公以得于家庭者溯考
亭之源委纂疏所由作也

元

劉因四書集義精要二十八卷

因字夢吉號靜修容城人至元中徵授承德郎右贊

善大夫未幾辭歸再以集賢學士徵不起

四書辨疑十五卷

不著撰人名氏

臣等謹案是書據蘇天爵康熙行狀蓋為寧晉陳天祥所作朱彝尊經義考曰四書辨疑元人凡有四家雲峯胡氏偃師陳氏黃巖陳成甫氏孟長文氏成甫長文並浙人雲峯一宗朱子其為偃師陳氏之書無疑所說當矣其稱偃師者元史稱陳天

祥因兄祐仕河南自寧晉家洛陽嘗居偃師南山故也
胡炳文四書通二十六卷

炳文見易類

炳文自序略曰四書通何為而作也懼夫讀者得其詞未通其意也六經天地也四書行天之日月也子朱子平生精力之所萃而堯舜禹湯文武周孔顏曾思孟之心之所寄也其書推之極天地萬物之奧而本之皆彝倫日用之懿也合之盡于至

大而析之極于至細也言若至近而涵至永之味
事皆至實而該至妙之理學者非曲暢而旁通之
未易謂之窮理也余潛心五十餘年會其同而辨
其異會之庶不失其宗辨之庶不惑于似也余不
敢自謂能通朱子之意後之通者倘恕其僭而正
其所未是則余之所深冀也

鄧文原序略曰漢世定論經傳于白虎觀因名白
虎通漢末封司馬遷後為史通通之義尚矣新安

雲峯胡先生之為四書通也悉取纂疏集成之戾
於朱子者刪而去之有所發揮者則附已說于後
如譜昭穆以正百世不遷之宗不使小宗得後大
宗者懼其亂也

臣等謹案江南志曰餘千饒魯之學本出朱子而
說多牴牾炳文深正其非作四書通以發其未盡
之蘊

張存中四書通證六卷

存中字德庸新安人

胡炳文序略曰北方杜維山有語孟旁通平水薛
壽之有四書引證皆失之太繁且各有未完處友
人張德庸精加讐校刪冗而從簡去非而從是又
能完其所未完者合而名之曰四書通證以附余
四書通之後學者于余之通知四書用意之深于
通證知四書用事之審

存中自序略曰四書集註明理用事簡明為尚至

集成而理晦矣胡雲峯去其晦而取其明則理通
矣今趙氏箋義出而事益繁存中不揆僭越去其
繁而存簡則事亦通矣

史伯璿四書管窺八卷

伯璿字文璣溫州平陽人

臣等謹案志稱伯璿嗜學強記博通經史及諸子
百家之書著窺外編論諸經史天文地理古今制
度名物為學者傳誦又有四書管窺辨諸說之與

朱子相悖者

許謙讀四書叢說四卷

謙見書類

吳師道序曰許君師仁山金先生履祥仁山師魯
齋王先生栢從登北山何先生基之門北山則學
于勉齋黃公而得朱子之傳者也君上承淵源雖
見仁山甚晚而天資純敏妙理融于言表成說具
于胸中與者白之約者暢之要者提之異者通之

畫圖以形其妙析段以顯其義叢說一編其有裨
于集註也審矣

倪士毅重訂四書輯釋二十一卷

士毅字仲宏歙縣人

汪克寬序曰紫陽集諸儒之大成作為集註章句
或問以惠後學而其詞渾然猶經于是真氏有集
義祝氏有附錄蔡氏趙氏有集疏纂疏而吳氏集
成最晚出同郡定宇陳櫟雲峯胡炳文賄集成之

書輾轉承誤莫知所擇乃各撫其精純刊繁補缺
定宇著四書發明雲峯著四書通而定宇晚年欲
合二書而一之未遂也友人道川倪氏實遊定宇
之門乃薈萃二家之說鳩僣精要考訂訛謬名曰
四書輯釋學者由是而求朱子之意則思過半矣
朱公遷四書通旨六卷

公遷見詩類

袁俊翁四書疑節十二卷

俊翁字敏齋袁州人

王充耘四書經疑貫通八卷

充耘見尚書類

詹道傳四書纂箋二十八卷

道傳臨川人始末無攷

明

四書大全三十六卷

永樂十三年胡廣等奉勅撰

蔡清四書蒙引十五卷

清見易類

刁包曰自金谿迄姚江凡學其學者莫不厭薄朱
註肆意妄解其于四子書穿鑿決裂甚矣大全後
惟蒙引專以發明朱註為主朱註者四書功臣蒙
引又朱註功臣也

章一陽四書正學淵源十卷

一陽號元江蘭谿人嘉靖中官漳州訓導

蕭陽復序曰金華何文定先生雖後朱子生而口
傳心授得之勉齋自是而傳之王文憲金文安許
文懿僅二百年間四先生踵武相承凡四子書悉
為之闡微疏與以翼朱註國朝採集大全書中溯
其源流所自謂非朱氏之適傳不可也元江表而
輯之章分句釋以附于朱註而傳註益顯先生司
訓于漳紹乃祖楓山之家學殆聞四先生之風而
興起者乎

劉剡四書通義二十卷

剡字用章休寧人

鄭曉四書講意

無卷數

曉見書類

呂柟四書因問六卷

柟見書類

高拱問辨錄十卷 日進直講五卷

拱見春秋類

薛應旂四書人物考四十卷

應旂字仲常武進人嘉靖進士官至陝西按察司副使
孫慎行元晏齋困思鈔三卷

慎行字聞斯武進人萬厯進士官至禮部尚書

葛寅亮四書湖南講九卷

寅亮錢塘人萬厯進士

萬尚烈四書測六卷

尚烈字思文南昌人

毛尚忠四書會解十卷

尚忠字子亮號誠庵嘉善人萬厯進士官至監察御

史

沈守正四書說叢十七卷

守正見詩類

鹿善繼四書說約

無卷數

善繼字伯順定興人萬厯進士官至太常寺少卿

寇慎四書酌言三十一卷

慎字永修號禮亭同官人萬厯進士官至蘇州府知府

姚舜牧四書疑問十一卷

舜牧見易類

陳禹謨經籍典同三卷 經言枝指一百卷

禹謨字錫元常熟人萬厯中由舉人官至四川按察司僉事

章世純四書留書六卷

世純字大力臨川人天啟舉人官至柳州府知府明
史文苑傳附見艾南英傳中

魯論四書通義三十八卷

論字孔壁號西麓江西新城人天啟中以貢生授潁
州州同官至福州府同知

徐養元趙漁同編四書集二十八卷

養元字長善漁字問源俱唐山人

陳仁錫四書考二十八卷 四書考異一卷

仁錫見易類

譚貞默三經見聖編一百八十卷

貞默字梁生號掃庵嘉興人崇禎進士官至國子監祭酒

張自烈四書大全辨三十八卷附錄六卷

自烈字爾公宜春人崇禎末南京國子監生

陸元輔曰爾公以大全成于明初督促而成擇之不詳故辨其異同實以存疑而已

徐邦佐四書經學考十卷補遺一卷 陳鵬霄續考一

卷

邦佐字孟超錢塘人鵬霄字天羽山陰人

陳際泰四書讀十卷

際泰見易類

桑拱陽四書則

無卷數

拱陽字暉升蒲州人崇禎舉人

喬中和圖書衍五卷

中和見易類

臣等謹案是編為四書講義而名之為圖書衍者
凡四書所言皆以五行八卦配合之也

右四書

欽定續文獻通考卷一百五十七